

Cambio parcial di ruta pa parada di Carnaval di San Nicolas

***Parada no ta pasa dilanti di Winter Garden, sino banda di Gallo Rojo**

ORANJESTAD (AAN):

Manera SAC a anuncia anteriormente, nan tabata evalua pa hasi cierto cambio di e ruta di parada Grandi di San Nicolas, pa purba evita pa cabez di e parada topa cu e rabo.

Tabata pensa prome pa laga e parada pasa door di Dr. Schaepmanstraat, pa despues drenta Weg Fontein y Sali bek riba Pastoor Hendrik straat.

Sinembargo durante un conferencia di prensa Diaranzon na Centro di Husticia, presidente di SAC Tecla Kelly a splica cu e cambio di e ruta ta bay ta na



comienzo di e parada.

Tur aña Carnaval tabata pasa riba e caminda dilanti di Rayo di Solo, pasa dilanti di Winter Garden, sigui pa dilanti etc.

E aña aki e gruponan mester cuminza forma for di Elmar bay abao te cu e rotonde na FTA.

Sra. Kelly a bisa cu e gruponan mag di yega te cu Elmar y no manera tur aña cu nan ta yega te YMCA of Joe Laveist pa Sali bay.

E number di e gruponan lo wordo marca riba caya pa hasi tur cos mas facil.

Presidente di SAC a bisa cu ta importante pa tur hende yega na ora y specialmente e prome gruponan cu tin cu Sali. E Parada ta cuminza net un tiki pariba di Elmar, unda cu e tin cu bay Zuid pa pasa door di Van Speyk straat y sigui bay direccion di Gallo Rojo.

E parada ta pasa den verboden banda di Gallo Rojo den Markt Straat y ta sigui bay pa Theater straat y bira bay ariba banda di e muraya. E parada ta sigui bay pues pa e rotondo cerca di ex Texas y ora cu e parada yega eynan, e ruta ta sigui normal.

Esey kiermen cu ta sigui pa B. Van de Veen Zeppenveldstraat, Grensweg, Lagoweg, pasa tras di pomp di gasoline di Essoville y despues di Marco (ex Kong Ming/ Wan Booy), ta lora bay abao manera semper.

Ora cu yega abao, e gruponan tin cu sigui subi riba e caminda di Weg Seroe Preto, te ora cu ripara cu e rabo a Sali bay caba for di Elmar.